



Broj: 11-49-212/19
Sarajevo, 28.01.2019.godine

Bosna i Hercegovina-Federacija Bosne i Hercegov.
Kanton Sarajevo - KANTON SARAJEVO
GRADONAČELNIK

PRIMLJENO:	05-02-2019	
Org. jed.	Broj	Općina
01-05-05-159/19		JPS

GRADSKO VIJEĆE GRADA SARAJEVA
PREDSJEDAVAJUĆI GRADSKOG VIJEĆA
Komisija za izbor i imenovanja

Predmet: Prijedlog za dodjelu priznanja „Počasni građanin Grada Sarajeva”

Poštovani,

U skladu sa odredbom člana 12. Odluke o priznanjima i nagradi Grada Sarajeva („Službene novine Kantona Sarajevo”, broj 34/10, 14/14 i 31/14) kojom je, između ostalog, propisano da prijedlog za dodjelu priznanja može podnijeti gradonačelnik Grada Sarajeva, podnosim

PRIJEDLOG
za dodjelu priznanja „Počasni građanin Grada Sarajeva”
glumici Mirjani Karanović

OBRAZLOŽENJE

Mirjana Karanović (Beograd, 28. januar 1957.) je pozorišna, televizijska i filmska glumica, i po ocjeni filmskih kritičara, jedna je od najboljih evropskih glumica.

Diplomirala je glumu na Fakultetu dramskih umjetnosti u Beogradu, na filmu je debitovala 1980. godine, glavnom ulogom u filmu Srđana Karanovića ”Petrijin venac”. Imala je sreću da joj već prva uloga donese slavu, a ”Petrijin venac” je danas jedan od kulturnih filmova jugoslovenske kinematografije.

Dobitnica je brojnih pozorišnih i filmskih nagrada internacionalnog karaktera.

Svjetsku slavu stekla je ulogom majke u filmu ”Otac na službenom putu” koji je osvojio Zlatnu palmu na Filmskom festivalu u Cannesu i bio nominovan za Oskara za najbolji strani film.



Mirjana Karanović igrala je Esmu, glavnu ulogu u filmu "Grbavica" autorice i rediteljice Jasmile Žbanić. Film je osvojio glavnu nagradu za najbolji film -Zlatnog medvjeda- na prestižnom Međunarodnom filmskom festivalu u Berlinu. Za tu ulogu Mirjanu Karanović je Evropska filmska akademija nominovala za najbolju evropsku glumicu.

Mirjana Karanović već više od 15 godina igra u predstavama na repertoaru Kamernog teatra 55 u Sarajevu, gdje je odigrala 240 predstava za koje je osvojila 19 nagrada.

Sa legendarnom predstavom „Helverova noć” u režiji Dine Mustafića, Mirjana Karanović predstavljala je Sarajevo na mnogim festivalima u regionu ali i širom svijeta - od Kaira do Bogote.

Također je učestvovala u predstavi "Hamlet" u režiji Harisa Pašovića i produkciji East West Centra Sarajevo, te više koprodukcijских projekata sa različitim sarajevskim partnerima.

Značajno je naglasiti da je Mirjana Karanović bila i ostala veliki borac za ljudska prava i pravdu. Protestovala je protiv Opsade Sarajeva već od samog početka 1992. godine, u različitim medijima u Srbiji i mnogim drugim evropskim zemljama. Bila je duboko solidarna sa građanima Sarajeva i to je bezbroj puta dokazala, često rizikujući i bivajući izložena kritikama, pa i uvredama i prijetnjama.

Igrajući različite uloge na scenama sarajevskih pozorišta i igrajući Sarajke u filmovima sarajevskih autora, Mirjana Karanović postala je suštinski dio sarajevske umjetničke scene. Publika je istinski voli, a mediji i javnost duboko poštuju.

Sa Sarajevom je povezana profesionalno, prijateljski i ljudski.

Imajući u vidu navedeno, smatram potrebnim da se Mirjani Karanović dodjeli priznanje Grada Sarajeva „Počasni građanin Grada Sarajeva”.

Inicijativu za dodjelu priznanja „Počasni građanin Grada Sarajeva” glumici Mirjani Karanović podnijeli su Kamerni teatar 55 Sarajevo i East West Centar Sarajevo.

S poštovanjem,

